

**Kalaallit Nunatsinni innuttaasut amerlanerit kalaallisut oqalussinnaalernissaannik periusissiatut iliuusissanut pilersaarummik kingusinnerpaamik Inatsisartut 2014-mi upernaakkut ataatsimiinneranni saqqummiunneqartussamut Naalakkersuisut suliaqaqqulugit Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

### **Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

### **Aappassaaneerpeqarnera**

Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaat siunnersuutip aappassaaneerpeqarnissaanut isumaliutissiissuteqarpoq. Ataatsimiititaliaq isumaliutissiissummi qupperneq 2-mi allappoq, ”Naalakkersuisut oqaatigaat, Naalakkersuisut iliuusissanut pilersaaruteqareersut, taamaattumillu siunnersuut tapersinnaangikkaat.”

Naalakkersuisut oqaatigissavaat, Naalakkersuisut siunnersuut siullermeerneqarmat oqanngimata iliuusissanut pilersaaruteqareernerarlutik. Akerlianilli Naalakkersuisut oqaatigaat, Naalakkersuisut iliuusissatut periusissiatullu pilersaarummik suliaqarsinnaassappata, Naalakkersuisut nassuiaammik suliaqaqqaartariaqassasut. Aamma Naalakkersuisut siullermeerinermi oqaatigaat, nassuiaat iliuusissatut periusissiatullu pilersaarutinik suliaqarnissami aallaavittut atorneqarsinnaassasoq.

Ataatsimiititaliaq isumaliutissiissummini allannguutissatut siunnersuummik, innuttaasut ilaasa kalaallisut oqalussinnaangitsut kalaallisut oqalussinnaalernissaat siunertaralugu periusissiatut iliuusissatullu pilersaarusiortoqarnissaanik imaqartumik saqqummiussinera Naalakkersuisut malugaat.

Naalakkersuisut isumaqarput ataatsimiititaliap allannguutissatut siunnersuummik saqqummiussinermigut aalajangiiffigisassatut siunnersuut erseqqissarniarlugu kissaatigigaa. Siullermeerinermi oqaatigineqartut innersuussutigalugit tamatuma nassuiaasiassamut, periusissiatut iliuusissatullu pilersaarutip suliarineqarnissaani aallaaviusussamut ilanngunneqarnissaa Naalakkersuisut isumagissavaat.

Naalakkersuisut oqaatigisinnaavaat periusissiatut iliuusissatullu pilersaarut aningaasanut inatsimmut sunniuteqassangatinneqartoq, taamaammallu pilersaarutip suliarineqarnissaata 2015-imi aningaasanut inatsisissatut siunnersuutip, UKA 2014-imi oqaluuserineqartussap suliarineqarnissaanut ataqatigiissaarneqarnissaa Naalakkersuisut isumagissagaat. Naalakkersuisut taamatut paasinnillutik allannguutissatut siunnersuutip akuersissutigineqarnissaa inassutigaa.